

PETRUQ Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jino gyo râ matú le, Yhâng é suí eq hpyûn gyûn é hui* râ matú le, haû Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyî má cháng luî, hkyin yù huî é bang nghut é, ² Garai Gasâng eq hkyin htoq yû luî, mingkân é byùbúng dut bâng chyáng dang kyô kat lê. Jeju eq nguóngón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhông é Yhumsíng Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyîn é yanmai, nga-nhúng lé, asik hku é dum hui nhâng mù, rù dui nyi é myit myoqbyù hkyô lé wó nhang é htoq agó, ⁴ nungmoq é matú mauhkông htoq má tô to byi bê nghut é, hkâ-nhám le, a hten a byoq é, agot a-û a dut é, a hpoî byuq é mùi lé le wó nhang é nghut lê. ⁵ Nungmoq gi, lumjíng kô é yanmai, ló htâng é ahkyíng má lhoq htoq

* **1:1** Yhâng é suí eq hpyûn gyûn é hui gá é gi, Yhâng é suí eq mara chí sân pyám byi é lé gá lê.

shit râ rì rì nghut é hkyi yù hkyô jé shoq, Garaî é hpungwup a-tsâm èq upzúng é hui bang nghut akô. ⁶ Haû mù, nungmoq gi, ahkuî razup zo, wuîhke hkyô junghkang jungmó má yón hpuzô é hui kó râ nghut kôlhang, gyai yhang gabú nyî keq. ⁷ Wuîhke hkyô haû pé mai, nungmoq é lumjínq myit gi, jet é hkyô lé wó chyam htoq mù, myi mai jên yù kôlhang htên byoq sê é hîng htoq je gyaú luî, Yesuq Hkrisduq htoq shit é hkûn, hkya-on kungtôn hkyô, hpungwup shingakang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuî, nungmoq, Yhang lé a myàng kôlhang, Yhang lé lumjínq kô é nghut mù, a ung htoq taî é eq hpungwup bo é gabú hkyô gi, nungmoq chyáng byíng jup nyi ri. ⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínq myit é akyú lé wó yu nyi kô é nghut ri.

¹⁰ Hkyi yù hkyô haû eq séng luî, nungmoq chyáng jé bê nghut é jeju hkyô lé taî é myiqhtoî pé gi, gyai yhang sidiq myit èq jí jí chyun chyun ho gon wú bekô nghut ri. ¹¹ Yhangmoq gi, Hkrisduq wuîhke jamjau hui luî, hpungwup shingakang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taî é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri. ¹² Mauhkúng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuî nungmoq lé taî kyo bê nghut é hkyô pé lé, yhangmoq taî kô é gi, yhumsing matú dojaú é a nghut é za, nungmoq matú nghut é hkyô

lé, yhangmoq gi, htoq shit sé nhang é hui bekô nghut ri. Maumang lagyô pé lháng gi, haú hkyô pé lé gyai wú nau bum akô nghut ri.

Chyoiyúng Nyí Râ Hkyô

¹³ Haú mù luí, zui saí râ matú nungmoq é i-myt lé hen to keq; yhumsing gùng yhumsing hkang nyí keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyí keq. ¹⁴ Jino gyô é zoshâng wuì su, myoq a bóng shí é pyat má nungmoq nyi tô é hkûn, nungmoq é agè ashop ô naú hkyô lé a châng kut é za, ¹⁵ haú nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyí keq. ¹⁶ Hkâsu mù gâ le, "Ngò gi, chyoiyúng Sû nghut é yanmai, nungmoq le chyoiyúng nyí keq."✧ ga kâ tô ri.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbing dông shí má nyi é u lé, Garai lé gyuq hkunggâ é myit mai asak duì keq. ¹⁸ Hkâsu mù gâ le, nungmoq gi, nungmoq é íchýí îwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za, ¹⁹ gumjup é eq mara a bo é sauzo nghut sù, Hkrisduq é hpaû dik é suí èq sheq hkyi yù huí é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlháng, jìhtùm ahkýing shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq duì toq yù mù, hpungwup shìngkang bò nhang é

✧ 1:16 Nhang 11:44-45; 19:2; 20:7

Garai Gasang lé, nungmoq gi, Hkrisduq dông mai lumjǐng kô é nghut lui, nungmoq é lumjǐng myit eq myit myoqbyù hkyô gi, Garai Gasâng chyáng nghut nyí bekô nghut ri.

²² Ahkuí kúm, nungmoq gi, haú tengmán hkyô lé châng é dông mai, yhumsing gùng yhumsing lhoq sân-yúng yù bekô nghut mù, nungmoq é gumang wuì lé, lhumzuí é dông chytđap bekô nghut lui, myit nhiklhum mai, rayuq eq rayuq gyai yhang chytđap lhum keq. ²³ Hkâsu mù gâ le, nungmoq gi, htên byoq sê é amyui mai dum hkú huí é a nghut é za, Garai Gasâng é, rù dui nyi é eq ru gǐng nyi é mungđang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gâ le,

"Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò mâ é banbó pé eq pung ri; wàhu mhan gi, nyhuí kyuq byuq lui, banbó pé gi, yoq gyó byuq lhê;

²⁵ nghut kôlhang, haú Yhumsing é mungđang gi, ahtum abyuq gǐng nyi lhê."[☆]
gâ tô ri. Haú gi, nungmoq lé hko kyo bê mungđang nghut lhê.

2

¹ Haú mù lui, i-myit dû é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkgangmó pé lé tô pyám keq. ² Asik hku é zonú pé naú lé ô naù gadaú é su, woi-nyí eq sêng é jet é

☆ 1:25 Esai 40:6-8

naú* lé ô naú gadaú nyî keq, haû jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gâ le, haû Yhumsîng gi, gè sù nghut é lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huî É Byù Myû

⁴ Byu pé mai hkyin htoq pyám kôlhang, Garaî Gasâng é matú hpaudap luî, Yhâng èq hkyin yù huî é, rû dui nyi é Luqgok nghut sù, haû Yhumsing chyáng nungmoq jé lé é hkûn, ⁵ nungmoq le, rû dui nyi é luqgok pé su, woi-nyí eq sêng é yhûm† saî nyi é hui luî, Yesuq Hkrisduq dông mai, Garaî èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyû dut bekô nghut ri. ⁶ Hkâsu mù gâ le, Chyúmdang má, "Wú keq, hkyin yù huî é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é hui râ a nghut."✧

ga taî tô ri. ⁷ Haû mù, lumjîng bang nungmoq é matú gi, luqgok haû hpaudap é nghut lhê. Nghut kôlhang, a lumjîng bâng é matú gi,

"Haû yhûm saî bang hkyin htoq pyâm é luqgok gi, htungchyûn mâ é ahkyak dik é luqgok‡ dut bê nghut ri."✧

ga le,

* **2:2** Woi-nyí eq sêng é jet é naú gâ é gi, Garaî Gasâng é mungdang lé taî é nghut lhê. † **2:5** Woi-nyí eq sêng é yhûm gâ é gi, noqkuq hpúng lé taî nau é nghut lhê. ✧ **2:6** Esai 28:16 ‡ **2:7** Ahkyak é luqgok gâ é gi, Hkrisduq lé taî é nghut lhê. ✧ **2:7** Hkya-on 118:22

⁸ "Byu pé lé, htûng leng râ luqgok eq myit leqbat nhâng râ luq mó cham dut bê nghut ri."[☆]
ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

⁹ Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yû huí é byuhú, hkohkâm hkyangjong amyû, chyoiyúng é byù myû, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

¹¹ Chyitdap é luzúm wuî ê, nungmoq é asak woi-nyí lé majan zân nyi é, yubak mara byíng Jup é ô naù gadaú hkyô lé koi pyám keq nghû, gó mîng byu pé eq byùbîng pé dông mingkan htoq má nyi é bang nungmoq lé, ngò, wum taí tsuq kat lhê. ¹² Haû a lumjîng shî é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kûm é buinyi má Garai lé shigyaú kó sháng gaq, a lumjîng shî é byu pé é ahkaû má haû su ge é asak duì hkyô dông nyi yap keq.

Up hkâng Bang Eq Yhumsîng Wui É A-ô Má Nyi Râ Hkyô

[☆] **2:8** Esai 8:14

13 Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle, 14 shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng eq nhang tô é mauzaû pê é a-ô má nghut kôle, nyi nyi keq. 15 Hkâsu mù gâ le, ge é hkyô kut é dông, byù nâ pê é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê. 16 Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchûng kô; Garai Gasang é dui-nhâng zoshâng wuì dông nyi keq. 17 Yuq hkangmó lé rago za hkunggâ é hkyô shit keq; lumjîng é gumang wuì lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

18 Dui-nhâng zoshâng wuì ê, hkungga myit banshoq eq, nungmoq é yhumsîng wuì é a-ô má nyi keq; ge é eq nú-nhám bâng é a-ô má za a nghut, byuwuì pê é a-ô má le nyi keq. 19 Hkâsu mù gâ le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huì é hkyô lé hpuzô é lé, jân pyâm é nghut le gi, hkya-on gîng é sù nghut lhê. 20 Nghut kôlhang, nungmoq gi, mara kut shut é yanmai, nhuq bat é hkâm zo luî, haû lé jân nyi é nghut le gi, hai aróng wó kó râ lú? Nghut kôlhang, nungmoq gi, ge é hkyô kut luî, wuîhke hui zô é lé jân pyâm é nghut jáng, haû gi, Garai Gasang hí má hkya-on gîng é hkyô nghut lhê. 21 Nungmoq gi, haû hkyo é matú ji yù huì é nghut lhê; haî mù gâ le, Hkrisduq gi, nungmoq é matú wuîhke hkyô huì é má, nungmoq

lé alik đông tô to byi bê nghut mù, nungmoq gi, Yhâng é hkyî-kám pé lé cháng râ dut lê.

²² "Yhang gi, hai mara le a kut shut, Yhâng é nhut mai mhaû é lé a myàng."☆

²³ Yhang gi, rhoi é huî é hkûn, yhangmoq lé a dum taû rhoi; wuîhke hkyô huî é hkûn, kyuq é dang a taí. Haû kut râ malaî, tengmán é đông jéyáng é Su chyáng, Yhânggùng lé ap pyâm ri. ²⁴ Nga-nhung gi, yubak mara eq wó shi gang mù, dingmán hkyo é matú asak wó duî kó sháng gaq ga, Yhang gi, sik zîng má, Yhânggùng èq yhang, nga-nhung é yubak mara lé Yhânggùng má wun pyâm byi bê nghut ri; Yhâng é dàm pé é yanmai, nungmoq gi, lhoq gê byí é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuî, nungmoq gi, haû sau zúng Sû eq nungmoq é asak woi-nyí lé upzúng Su chyáng lhing taû lò bekô nghut ri.

3

Ikun Myhî Pé Eq Ikun Hpô Pé

¹ Ikun myhî pé ê, haû eq rajung za, yhumsing é ikun hpó uphkanq é a-ô má nyi keq; haû hkûn, yhangmoq mâ é rayuq yuq, haû mungdang lé a lumjîng kôlhang, ² yhumsing é asak duî hkyô mâ é sansêng é hkyô eq hkunggâ é hkyô lé myàng kôjáng, dang đông a nghut é za, yhâng é yhumsîng myhî é nyi yap é sâmlai đông mai yhang lé wó lhoq lhiq yû râ nghut lê. ³ Nungmoq yúng é hkyô gi, ahtoq pyâm za nghut é, xâmban nik é đông, hîng zè mhôn chung é eq réng é mebu wut é đông mai lo

☆ **2:22** Esai 53:9

é a ge nghut. ⁴ Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoî é yúng hkyô nghut é nungmoq é i-myt unghkaû mâ é su é yúng hkyô sheq dut râ lê. ⁵ Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haû dông mhôn yù yù kut kô é nghut lê. ⁶ Sarah gi, Abraham é jìno gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haú hkûn, nungmoq é kyûdung dang lé a he-ngik pyám byi râ nghut lê.

Ge É Kut Luí, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huí lhúm nyi keq; myit wú nô mù, gumang nhiktâng wuì su chyitdap lhúm nyi keq; shogyo nhikmyin myit bò luí, i-myt nyhum nyi keq. ⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gâ le, nungmoq gi, haú pê é matú, shimân jeju muì wó hkam yù kó sháng gaq ga, ji yu é hui kô é ru nghut lê. ¹⁰ Hkâsu mù gâ le, "Asak duì râ lé chyitdap é eq ge é buinyi pé lé myàng nau é sù ó yuq le, yhâng é shô lé,

agè ashop é mai, yhâng é nhutwuî lé, mhaú dang taî é mai, lhoq kâng pyám ra râ nghut lhê.

11 Yhang gi, agè ashop hkyô mai lhing tau mù, ge é kut ra râ nghut lhê; yhang gi, ngingón simsaq hkyô lé hô mù, châng hkat nyî ra râ nghut lhê.

12 Hkâsu mù gâ le, haû Yhumsing é myoqjí gi, dingmán bang lé wú nyî é nghut luî, yhangmoq é kyûdung dang lé, Yhâng é nohkyap éq gyo byî ri;

nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyám ri."✧

gâ tô ri.

13 Ge é hkyô lé, nungmoq gyai yhang kut nau nyî é nghut le gi, ó yuq wá nungmoq lé wó gunjang râ lhú? 14 Nghut kôlhang, dingmán hkyo é matú, nungmoq wúhke jamjau huî le lhang, nungmoq gi, hkungsô wó nyî ri. "Yhangmoq gyuq é hkyô lé hkâgyuq kó; hkâgyuq dàn kó."✧

15 Nungmoq kúm gi, myit nhiklum má, Hkrisduq lé, Yhumsing dông jowò byî keq. Nang wó é myit myoqbyù hkyô lé myî é sù yuq hkangmó lé, haî mù wó é hkyô tû taî kyo râ matú, ayang hen to aq. Nghut kôlhang, nú-nhâm é eq hkunggâ é dông haû lé kut nyî aq;

16 nungmoq é unghkaû myit san za dut nyî keq, haú hkûn, Hkrisduq dông mai nungmoq wó é ge é a-kyang lé rhoi dang taî é bang gi, yhangmoq lumù gansang é yanmai hoq hpû é hui kó râ nghut lhê. 17 Garai Gasang ô nau é nghut le gi, agè

ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê. ¹⁸ Hkâsu mù gâ le, nungmoq lé Garai Gasâng chyáng shuí jé shoq, Hkrisduq gi, byu pê é yubak marâ é yanmai, radàm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byî é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri. ¹⁹ Yhang gi, Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haû pé gi, a-nham lé, Noaq é ipyat má wuì-sanghpo lé Noaq tsuq nyi é hkûn Garai Gasang myit hîng hîng láng nyi é u lé, jîno a gyô é bang nghut akô. Wuì-sanghpo má wàng mù, wuì mai hkyi yù huí é byù shau luî, shit yuq za nghut akô. ²¹ Wuì haû gi, ahkuî nungmoq lé le hkyi yu é nghut é bapisma é azông nghut ri; haû gi, gungdu mâ é agot a-û lé huí sêng pyám byî é a nghut é za, sansêng é unghkaû myit mai Garai Gasâng é hí má gidìq tô é ru nghut lhê. Yesuq Hkrisduq é dum dui toq hkyô dông, nungmoq gi, bapisma hkâm yù luî, hkyi yu é hui kô é nghut lhê. ²² Yesuq Hkrisduq gi, mauhkûng má doq ló luî, Garai Gasâng é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

4

Garai Gasâng É Matú Asak Dui Râ Hkyô

¹ Haû mù luî, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau èq yhumsing gùng má gyehking dông wut to keq, haî mù gâ le, yhâng é gungdu

má hpuzo bê sù gi, mara eq gang bê nghut ri. ² Haû nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê. ³ Hkâsu mù gâ le, nungmoq gi, laî lò bê ahkyíng má, a lumjíng shî é byu pé hkyin kut nau é hkyô nghut é, shut é dông nyi zô lhúm nau é i-myit, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye lhai râ wut jung zoshuq lé yut yut ô nau é hkyô, achag achyut é hparà noq hkyô pé má, ahkyíng luq shoq nyi laî lò bê bang nghut akô. ⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵ Nghut kôlhang, yhangmoq gi, dui nyi é bang eq shî bê bang lé tarâ jéyáng râ rì rì nghut to Sù lé jihpán shit kyo ra kó râ nghut lhê. ⁶ Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luí ga jang, yhangmoq gi, byù dông mai tarâ jéyáng é hui râ eq, woi-nyí eq séng luí ga jang, Garai Gasang dông mai asak wó dui râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haû mù luí, nungmoq kyû wó dung kó sháng gaq, bún gying luí, yhumsing gùng yhumsíng hkang nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhùm é hkyô nghut lhê, haî mù gâ le, chyitdap myit gi, yubak mara myo myo lé wó nghop pyâm é nghut lhê.

⁹ Rayuq eq rayuq, taî nyung nyâng é hkyô a bo é za, rago hkulum lhum keq. ¹⁰ Yuq hkingmó gi, yhumsîng wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é eq rago chung jaì râ lhê. ¹¹ Rayuq yuq taî é nghut jáng, Garai Gasâng é mungdang haû eq yhang rajung za taí ra râ nghut lhê. Garai Gasang gi, lhunglháng má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byî é wum-ô eq dojaú ra râ nghut lhê. Haû hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huí É Hkyô

¹² Chyitdap é luzúm wuî ê, wuîhke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkang eq rahá Yhang htoq shit é hkûn, nungmoq gi, gabú dik é hui kó râ nghut lhê. ¹⁴ Hkrisduq é myìng yanmai, nungmoq gi, rhei é hui zô é nghut jáng, hkungsô wó nyi ri; hkâsu mù gâ le, hpungwup shingkang bo é Woi-nyí nghu é, Garai Gasâng é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotù agè ashop kut sù, góbang é mú má cháng gunjang sù dông jamjau huí é a dut sháng gaq. ¹⁶ Nghut kôhang, Hkristan rayuq dông nungmoq jamjau huí é nghut le gi, hkâhoq nyi kó, Garai

Gasang lé kúm gi, myìng hau é yanmai hkya-ôn nyì keq. ¹⁷ Hkâsu mù gâ le, tarâ jéyáng râ ahkýng gi, jé bê nghut luí, Garai Gasâng é ikun byu pé mai hí râ nghut lhê; haû gi, nga-nhúng mai hí é nghut jáng, Garai Gasâng é gabú danglù lé a châng é bang gi, hkâsu wá dut lò râ nghut lhê lú?

¹⁸ "Haû dingmán sù, hkyi yù hui râ wuî é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?"[☆]

gâ tô ri.

¹⁹ Haû nghut mù luí, Garai Gasang ô nau é đông jamjau huí é bang gi, yhumsing gùng lé, lhumzuí é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wuî Éq Zorâm Wuî

¹ Nungmoq mâ é hpúng suwún wuî lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shìngkang lé bo hkâm râ nghut sù đông mai sang kat kôlé: ² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang đông dojaú nyì keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsîng kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. ³ Nungmoq é loq má ap byì to bê bang lé a up zô é za, yhangmoq é hí má alik dut

☆ **4:18** Sânghkyang 11:31

* **5:2** Sau hpúng gâ é gi, lumjìng bang lé gâ lhê.

nyì keq. ⁴ Haû jáng, Sau zúng Agyì mó† htoq shit é hkûn, nungmoq gi, hpungwup shingkang bo é, hkâ-nhâm le a shum a byuq é janmaú lé myang hap yù kó râ nghut lhê.

⁵ Zorâm wuì ê, nungmoq le, nungmoq htoq ipyat ko bâng é a-ô má nyì keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le,

"Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byî ri."✧

ga tô ri. ⁶ Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsing myit lé yhumsîng lhoq nyhum nyì keq. ⁷ Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyì sù nghut lhê.

⁸ Yhumsing gùng lé yhumsîng hkâng mù, machya nyì keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, myíng wún é hkanghkyi su hkat gadaú jón wún ri. ⁹ Yhang lé htuq htîng pyám mù, lumjîng myit má gîngtîng nyì keq, haî mù gâ le, mingkan gón mâ é nungmoq é gumang wuì le, rajung zâ é jamjau hkyô pé huì zô nyì kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkâng matú nungmoq lé ji yù bê

† 5:4 Sau zúng Agyì mó gâ é gi, Hkrisduq lé gâ é nghut lhê. ✧ 5:5 Sânghkyang 3:34

nghut luî, nungmoq razup zo jamjau huî é htâng má, Yhang yhang nungmoq lé gumjup nhâng mù, wum bô nhâng luî, ging ging tít tít dut nhâng rá nghut lhê. ¹¹ Haû hpungwup a-tsam banshoq gi, Yhâng chyáng pyat dedu ahtum abyuq rû joq nyî sháng gaq. Amen.

Ló Htâng É Shi-kyâm Dang

¹² Lhumzû é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haû pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haû má yap gîng nyî keq.

¹³ Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee